

ՊԱՏՆԱՐԱՐԱՆԱԴԱՐԱՐԱԳԱՆ

ՊԻՏԵՐ ՔԱՌԻԻ

ԳՐԻԳՈՐԻՍ ԱՂԹԱՄԱՐՅՈՒ ՍԻՐԱԾ ԷԱԿԻ ԻՆՔՆՈՒԹՅՈՒՆԸ

Րամեալ սիրով սիրա իմ ցրնծայ,
Հեռաստանէ առ քեզ խայտեայ,
Եւ ողջունեալ քեզ համբոյր տայ,
Սիրով ի սէռ քո կապեցայ . . .

Նաղեալ սիրա իմ յոյժ տոջորի,
Խանդաղակաթ առ քեզ լինի,
Սիրով կապեալ ընդ քեզ կապի
'Իայլ ի քեզնէ բաժանի':

Ոհ, թէ այն պահն, որ զքեզ տեսնէի,
Զաջդ տիրաշօշալի ես համբուրէի,
Ժամ մի դէմ երեսիդ աջօք հայէի,
Ապա զհոգիս մարմնոյս իմ աւանդէի²:

Սերը, մարդկային այդ ամենասուրբ զգացումը հայ միջնադարյան քնարերգության հիմնական եւ գլխավոր նյութն է: Եւ Գրիգորիս Աղթամարցու դերն այդ ասպարեզում միշտ մեծ է եղել եւ զգալի ազդեցություն է թողել հաջորդ սիրերգակների վրա: Հետեւաբար, հետազոտողների աշխատություններում նշանակալի տեղ է զբաղեցնում նրա անունով հայտնի ստեղծագործությունների գեղարվեստական քննարկումը: Իսկ նորագույն շրջանի մասին կխոսենք հետո՝ մանրամասնորեն: Այժմ սակայն ցանկանում եմ ընթերցողի ուշադրությունը հրավիրել մի նոր փաստի վրա, որ հայտնաբերել է հանգուցյալ հայագետ Ս. Մնացականյանը³: Խոսքը սիրերգերի անդրանիկ ժողովածուի մասին է: Ինչպես արդեն հայտնի է, դրանում տեղ գտած բանաստեղծությունները բաժանվում են երեք խմբի, որոնցից առաջինը բացառապես

1 Ն. Ալիևան, Զաքարիա եպս. Գնունեաց եւ իւր տաղերը, Վիեննա, 1910, էջ 44, տող 20-23 եւ էջ 45, տող 36-39:

2 Այդ տողերը գրել է Հակոբ Թորթաթեցին ի պատիվ իր ուսուսիչ Հակոբ Այվաթեցու 1612-14 թվականներին. տե՛ս Ն. Ալիևան, Հինգ պանդուխտ տաղասացներ, Վիեննա, 1921, էջ 174-75:

3 Ա. Մնացականյան, Միջնադարյան սիրերգերի նորահայտ անդրանիկ ժողովածուն եւ հայրենի հարցը. «Էջեր հայ ժողովրդի պատմության եւ բանասիրության», Երեւան, 1971, էջ 96-126. այսուհետեւ՝ Ա. Մնացականյան:

նվիրված է սիրո խնդրին: Այս խմբի բանաստեղծությունների մոտ կեսի հեղինակը Գրիգորիս Աղթամարցին է:

Հակառակ այն վիճաբանությանը, որ արձանվել է նրա բնագրերի վերծանման ընթացքում, հետազոտողները մեծ մասամբ հակված են Գրիգորիսի տաղերը վերագրել հեղինակի երիտասարդության շրջանին: Գիտենք, որ նա կաթողիկոսական աթոռ բարձրացավ 1512 թ., որից հետո մի քանի տարի մնաց Գրիգոր վարդապետի խնամքի տակ: Վերջինիս թելադրանքով երիտասարդ բանաստեղծը գրի է առել քերթվածներ, այդ թվում եւ Ս. Մարինոսի վարքը, որ հորինվել է 1516-ին.

Առ յտառս երջանիկ րաբունապետի՝
Գրիգորիոս անուն արթուն հըսկողի,
Քաջ հըռետոր անյաղթ փիլիսոփայի
Եւ երիցս երանեալ մեծ վարժապետի⁴:

Բայց հետո հասկանում ենք, որ սեւ ամպերը խավարեցրել են նրա երջանկության արեւը, եւ մեզ անհայտ ինչ-որ պատճառով վարդապետը հեռացել է իր աշակերտից: Ուստի, նա դիմում է «գանգատ» ժանրին, որով սովորաբար մերժված սիրահարն իր տրտունջն ու վիշտն էր արտահայտում, սիրուից գույթ ու կարեկցանք էր խնդրում: Այս կերպ Աղթամարցին ցույց է տալիս, թե հոգեկան ինչ ծանր վիճակում է գտնվում ինքը սիրած վարդապետի բացակայությունից ի վեր.

Իմ կեանքս է դառն ու դիժար,
Ողբամ ես միշտ եւ անդադար,
Մեղօք եմ վիրաւորեալ,
Անկեալ ի յախտ չարաչար⁵:

Իսկ երկրորդ աղերսանքը եզրափակում է մի շարք հետաքրքիր համեմատություններով: Բաբունապետը նմանեցվում է սիրամարգի, վարդի թփի, անուշահոտ խնկի եւ դրախտի ծառի: Սակայն սրանցից ոչ մեկը չի կարող պատկերել վարդապետին ըստ արժանվույն, ուստի եզրակացնում է, թե նա անմահն է անհամեմատելի է⁶:

Ճիշտ է՝ մեղքերը թվարկելիս բանաստեղծը հիշում է Աստվածածնին: Սակայն Մարիամին հասցեագրած նրա երեք տաղերը (թ. 12, 13, 14) կրում են ավելի ընդհանուր բնույթ եւ, իբրեւ այդպիսիք, չեն կարող հեղինակի ապրումների ծնունդ համարվել:

Այդ միջոցին նրա կյանքի խաղաղությունը խաթարվել էր այլ հոգսերով: Շահ Իսմայիլի մահից հետո խռովություն էր պայթել, եւ 1523-ին թվագրած մի բանաստեղծության մեջ Աղթամարցին հաղորդում է.

Հագարացիք օրինօք թիւր,
Զագգս խանձեն որպէս զիւր⁷:

4 «Գրիգորիս Աղթամարցի XVI դ.», աշխատ. Մ. Ավդալբեգյանի, Երևան, 1963, էջ 120. այսուհետեւ՝ «Գրիգորիս Աղթամարցի»:

5 «Գրիգորիս Աղթամարցի», էջ 156, տող 25-28:

6 Տե՛ս անդ, էջ 159:

7 Անդ, էջ 142:

Կաթողիկոսարանն անգամ վտանգի մեջ էր, եւ Գրիգորիսը, ինչպես նշում է նկատիչ Հովսեփ վարդապետին ուղղված ծոնում, ստիպված մի քանի տարի շարունակ թափառական կյանք է վարել՝ վանքից վանք տեղափոխվելով⁸:

Կաթողիկոսի գեղագիտական ճաշակի զարգացման եւ կրթության գործում նկատելի է Հովսեփի ավանդը: Սակայն, դատելով գովաբանության խոսքերից՝ կարելի է եզրակացնել, որ Կաթողիկոսը Հովսեփի հետ նույնքան մտերիմ չի եղել, որքան Գրիգոր րաբունապետի հետ: Հովսեփի բոլոր արժանիքները որոշակի են, առարկայական՝ առանց երեսակայական թռիչքի: Օրինակ՝ նա իմաստուն է, մաքուր հոգի ունի եւ այլն: Կարծես թե բանաստեղծը բովանդակությունը ստորադասել է ձեռին՝ թուղթը մշակելով տնակապ եւ՝ տողերի սկզբում «Գրիգորիսէ» եւ՝ վերջում «Յովսէփին է» ծայրակապեր ստեղծելով, որպեսզի ցուցաբերի քերթողական արվեստի ասպարեզում ձեռք բերած իր վարպետությունը:

Վաղ շրջանի ստեղծագործություններին հաջորդում է տաղերի մի շարք, որոնց կառուցվածքն ու տոնը շոշափելիորեն տարբերվում են նախորդներից: Եւ ամեն մեկում շեշտը դրված է ոչ այդքան ձեռի, որքան լեզվի ճկունության ու պատկերազարդության վրա: Եւ քանի որ նույն պատկերները արագափոխ նրբերանգներով կրկնվում են շարքի բանաստեղծություններում, ուստի արդարացի է դիտել դրանք որպես մեկ միավոր (վերոհիշյալ անդրանիկ ժողովածուի մեջ այդպես էլ երևում են):

Բոլոր ուսումնասիրողների հիացմունքն ու զարմանքը շարժելով՝ այս քնքուշ բանաստեղծությունները, սակայն բանասիրության նոր շրջանի մեջ տարակարծության առարկա են դարձել: Մեկնաբանության մի ճյուղավորումը պնդում է, որ դրանք գեղեցիկ կնոջ երկրպագության հուզված արտահայտություններ են: Չուպանյանը գրում է, թե «այս բանաստեղծությունները... երգում են կնոջ գեղեցկությունը եւ սիրո գորությունը...»⁹: Իսկ Աբեղյանը լուսաբանում է հետեւյալ ձեռով. «Իր անկեղծ ավյունով... շլացնում է ընթերցողներին, ինչպես եւ Աղթամարցին ինքը շլացած է եղել իր գեղուհու «աստվածային պատկերով»: Իսկույն երեսան է գալիս կրակոտ բնավորությունը, որ տարված է, հափշտակված է մի ճոխ անձից եւ ուզում է նկարել այն»¹⁰:

Ի տարբերություն այդ աշխարհիկ տեսությանը՝ «chercher la femme» բնաբանով, Ակինյանը հակամետ է Աղթամարցու հիշյալ շարքի մի քանի բանաստեղծություններին կրոնական գունավորում վերագրելու¹¹: «Գովեմ զքեզ մարմնով հրեշտակ» սկավաձքով ոտանավորի մասին նա գրում է, թե «բովանդակությւնը եկեղեցույ գովեստն է»¹²: Եւ արդարեւ տեղեր կան, որոնք թերեւս կարելի է այդպես հասկանալ: Սակայն բանաստեղծության այլ կետեր հերքում են այդ հայացքը, ինչպես արդեն ցույց

8 Տե՛ս անդ, էջ 183:

9 Արշակ Չուպանյան, *Les trouvères arméniens*, Փարիզ, 1906, էջ 199:

10 Մանուկ Աբեղյան, Հայոց իին գրականության պատմություն, հ. Բ., Բեյրութ, 1969, էջ 411. այսուհետեւ՝ Մ. Աբեղյան:

11 Տե՛ս Ն. Ակինեան, Գրիգորիս Ա. կաթողիկոս Աղթամարի. կետանք եւ քերթուածները, Վիեննա, 1956. այսուհետեւ՝ Ն. Ակինեան:

12 Ն. Ակինեան, էջ 212.:

է տվել Մ. Ավդալբեգյանը: Վերջինս ճիշտ է նկատել, որ «Աղեն» բառը Գրիգորիսը պարզաբանում է «մերս եկեղեցի» ավելացումով¹³: Ուրեմն, քանի որ հեղինակը ոգեկոչում է դրախտի ծառի պտուղը՝ հարկ է ենթադրել, թե նա դիմում է ոչ թե հավատացյալ ժողովրդին, այլ անհատի, որի ինքնությունը քողարկում է «բարուն» կոչական ձեւն օգտագործելով:

Իսկ մնացած պատկերներին անդրադառնալիս Ալինյանը նկատում է, որ որոշ նկարագրություններ առավել բնորոշ են առնական դեմքին: Այդ նկարագրություններից առաջին հերթին պետք է նշել Հին Կտակարանի կերպարները՝ Հովսեփ Քանանացի (տաղ 2), Մեթ Էս Աբիսողում (տաղ 22), Միքայել Հրեշտակապետի (տաղ 13, 22), հետո՝ ռազմական տերմինաբանությունը, ինչպես «Ռազմիցս գլուխ զինուոր, զորանաս ի զորավարեն» (տաղ 19) և որսի թեման՝ «Առիւծ ի շամբի բազկօք զորաւոր... սարսափեն, դողան երէքդ բոլոր» և «քան զքաշ արծիւ բարձրագնաց ես» (տաղ 21):

Եթե սրանք կնոջ թեկնածությունը բացառում են, ապա ուրեմն տաղերն ո՞ւմ են հասցեագրված:

Ալինյանի կարծիքով դրանք ընծայված են տարբեր անձերի: «Դու ես արեգակ» տաղը հասցեագրված է Կաթողիկոսի եղբայրներից մեկին՝ Ամիր Գուրգենին կամ Սմբատին¹⁴, թեև թվում է, թե ուղղված է ավելի հեղինակավոր մեկին, որ նմանվում է Մեքայի և «ոսկի մետրասայի»¹⁵, մի արտահայտություն, որ հիշեցնում է թ. 10 տաղից քաղված հետևյալ տողը՝ «տուն իմաստության շինեալ ի յահել հօրի բազկէ»¹⁶: Նմանապես՝ «Էս եմ ծարաւեալ, արբո՛ ինձ մի կաթ» տողն¹⁷ ավելի ծնողական, քան թե եղբայրական խնամք է ենթադրում:

«Դու դրախտ եղենայ» տաղը Ալինյանը համարում է Աղթամարի Ս. Խաչ եկեղեցու նկարագրությունը և «Գունդք չար այսոցն ի քէն հալածի» տողը մեկնաբանում է՝ կղզուց քրդերի փախստի արտահայտություն¹⁸: Սա նույնպես երկբայելի է, քանի որ այդ դեպքում «Դու սքանչելագործ քան զօրաւոր խաչ» տողն¹⁹ անիմաստ կդառնա: Բացի այդ՝ անդրանիկ ժողովածուի խմբագիրն առաջին մասը վերագրել է «գովասանաբար առ ոմն բաղձալիս»²⁰: Այսինքն՝ դրանք պետք է ընկալել որպես ցանկալի մարդուն, և ոչ առարկային կամ իրադարձությանը նվիրված ներբողներ: Եւ քանի որ նա մոտ է մեր հեղինակին թե՛ ժամանակով և թե՛ աշխարհյացքով, նրա խոսքը պետք է լուրջ ընդունել:

«Աստվածանկար պատկեր յօրինեալ ի յարարողէն» (տաղ 19) և «Դու ես յԱղինայ դրախտէն» (տաղ 17) սկսվածքով բանաստեղծությունները կապում են Ս. Անտոնի

13 «Գրիգորիս Աղթամարցի», էջ 70:

14 Տե՛ս Ն. Ալինեան, էջ ԸԼԸ.:

15 «Գրիգորիս Աղթամարցի», էջ 200:

16 Անդ, էջ 190:

17 Անդ, էջ 202:

18 Տե՛ս Ն. Ալինեան, էջ ԸԼԸ.-ԸԼԹ.:

19 Տե՛ս «Գրիգորիս Աղթամարցի», էջ 196:

20 Ա. Մանգականյան, էջ 100:

անձի հետ, որն առաջինի մեջ հիշատակվում է հանվանե: Սակայն երկրորդում կա «ի լեռնէն գաս սինէական» տողը²¹: Սինեն մի սրբավայր է, որի հետ չի առնչվել եգիպտացի անվանի ճգնավորը²²: Միաժամանակ ուշագրավ մի կովան է տալիս փոքրատառ ժ գրչագիրը, որը խորագրված է «Տաղ ի Գրիգորիս Աղթամարցոյ ասացեալ ի վերայ վարդապետին իւրոյ»²³: Աբեղյանը, կարծելով, որ այս քերթվածները կնոջ կերպարն են ոգեկոչում, սրատեսությամբ նկատել է, որ Գրիգորիսն առաջին հայ բանաստեղծն է, որ նկարագրել է գեղուհու ներաշխարհ²⁴. սիրային պոեզիայի հետագա ուղին դիտարկելիս համոզվում ենք, որ Աղթամարցին այս առումով անգերազանցելի է:

Ակինյանը գրում է. «Շատ ցանցառ է մեր մատենագրության մեջ առնական դեմքի նկարագրությունը»²⁵: Բայց նայած թե ո՞ր ժանրի երկերում: Ուսուցչի գովասանքն ամփոփող ստեղծագործություններում կարելի է տեսնել նմանօրինակ շատ նկարագրություններ: Վերցնենք Գրիգոր Սկեռացու ձոնն ի պատիվ Ներսես Լամբրոնացու²⁶: Երկը բացվում է ժանրի կանոնների բացատրությամբ, որի համաձայն՝ գովասանքները սկսվում են «ի զօրութենէ մարմնոյ, ի բարեչափութենէ հասակի, ի գեղեցկամասնութենէ անդամոց, իսկ որ ի ներքուստ զբարեմասնութեանն սովորեցին նկարագրել զգեղ, այլ իմն ընդ դիմակօք զբաշահաճութիւնն ստորագրեն»²⁷: Օրինակ՝ Տաթևացու մասին Առաքել Սյունեցին գրում է, թե հողեղեն լեզուն չի կարող արտահայտել «ոչ զմարմնոյն գեղեցկութիւնն եւ ոչ զհոգւոյն պայծառութիւնն»²⁸:

Ինչպես սիրուիուն նկարագրելիս են աշուղները նրա մարմնի եւ դեմքի բոլոր մասերը հանգամանորեն պատկերում, այդպես դեկավարվում են եւ ներբողագիրները: Առաքել Սյունեցին հիշատակում է Գրիգոր Տաթևացու «զգեղեցկայարմար շրթոսնն, զերկնակառոյց բազուկն եւ զնորիաբաշխ աջն, զվնդակազմ անդամսն եւ զանասանելի ոտսն, զօճահալած գարշապարն եւ զերկնաթոյճ գնացսն»²⁹: Գրիգոր Կեսարացին այս կերպ է նկարագրում իր վախճանված վարդապետին՝ Սրապիոնին.

Է~ շունչ իմ եւ հոգի, զիա՛րդ քաշեցար,

Ընտիր մարմնով սուրբ եւ կոյս... զիա՛րդ լռեցար...

Յայտդ քո լուսով, ունքդ քո կամար, զիա՛րդ անտեսացար...

Շրթունքդ լար, կլափդ փալուն, զիա՛րդ ի հող մածար³⁰:

21 «Գրիգորիս Աղթամարցի», էջ 184:

22 «Արեգակնափայլ գեղով լի լուսին» (տաղ 18) սկսվածքով բանաստեղծության մեջ հանդիպում ենք «...զլուսանիս ի լեռնոն Սինէ» կիսատողին. տե՛ս «Գրիգորիս Աղթամարցի», էջ 186, տող 15:

23 Տե՛ս անդ, էջ 188:

24 Տե՛ս Մ. Աբեղյան, էջ 412:

25 Տե՛ս Ն. Ակինեան, էջ 61.Ը.:

26 Տե՛ս «Գրիգորի Սկեռացոյ ներբողեան ի Սուրբն Ներսես Լամբրոնացի» (Մովսէսը հայկականք ԺԵ.), Վենետիկ, 1854. այսուհետեւ՝ «Գրիգորի Սկեռացոյ ներբողեան»:

27 Անդ, էջ 9:

28 «Առաքել վարդապետի ասացեալ ներբողեան առ քաջ հռետորն եւ տիեզերալոյս վարդապետն Մեծն Գրիգոր Տաթևացի աշակերտ Յոհաննու Կախիկ կոչեցելոյ» (Տաթևացու քարոզգրքի Ամառան հատորում), Կ. Պոլիս, 1741, էջ 718:

29 Անդ, էջ 718:

30 Ն. Ակինեան, Մովսես Գ. Տաթևացի, Վիեննա, 1936, էջ 415-16:

Հուզմունքով լցված՝ նկարագրության սլացքը մինչև իդեալացման աստիճանի է հասնում: Ինչպես վկայում է Գրիգոր Սկեռացին՝ իբրև ավանդույթ մեջբերելով «գալատկերանալն ի կերպարան սկզբնատպին յոր եւ հաստատեցան»³¹: Հիշենք նաև Մաղաքիայի խոսքը Գրիգոր Մշեցու մասին. «Շնորհքն աստուածային ի քեզ իջեալ է, աստուածատիպ կերպիդ հոգիս փափագէ»³²:

Դժբախտաբար, անհնարին է այստեղ բոլոր առանձնահատկությունները քննարկման երթարկել եւ ներկայացնել Գրիգորիսի տաղերի հետ ունեցած ընդհանրությունները: Սակայն նպատակահարմար չէ անդրադառնալ բանաստեղծի այլաբանություններին՝ սիրո հարցն անլուծելի թողնելով: Հարցի կապակցությամբ Ավդալբեգյանը գրում է, որ Աղթամարցու «տաղերի գերակշիռ մասը ավելի իրական սիրո պակասի արտահայտություններ են, սիրո կարոտի, տենչանքների ու երազանքների արտահայտություններ»³³: Այս եզրակացությանը նա հանգել է Հովնաթան Նաղաշի բաղդատությունից: Ակներեւ է, որ այսպիսի տողերը լիովին բացակայում են Աղթամարցու ստեղծագործություններում.

Շամամներիդ համար դառն եմ,
Թող, որ ձեռս մէջն խառնեմ,
Ինձ ծախեմ՝ էդ բախչեդ առնեմ:
Զալում, թող ես
Եմիշ քաղեմ,
Մէկ ծիծաղեմ³⁴:

Իսկ ընդհակառակը մի շատ սրտառույշ տաղում Հովնաթանը դիմում է Սիմեոն վարդապետին.

Պաղալից ձիթենի՝ ի մէջ Տեառն տան,
Աշտարակ ոսկի՝ եղեալ յանդիման,
Լցեալ գործնական, այլեւ տեսական
Առաքինութեամբ, Սիմեոն վարդապետ ,
Ո՛րք է քեզ նման երկիրս Հայաստան...
Քո գերեզմանիդ ծառայ Յովնաթան³⁵:

Նրա անկեղծ հուզմունքը ցույց է տալիս, որ սիրային բնույթ ունեցող մարդկային հարաբերությունը կարող է եւ սեռային չլինել: Եւ եթե սարկավազ աշուղն այդպես է գրում, ապա ի՞նչ էին գգում վանականները. Շիրակացին վերհիշելով գրում է, թե Տյուքիկոսը «սիրեաց զիս որպէս գորդի իւր եւ պարապեաց յիս յամենայն խորհրդոց իւրոց»³⁶:

31 «Գրիգորի Սկեռացույ ներքողեան», էջ 12:

32 Ն. ԱԿԻՆԵԱՆ, Գովութիւն Գրիգոր վրդ. Մշեցույ ի Մաղաքիա իւր աշակերտէ ասացեալ. «Հանդէս Ամսօրեայ», 1952, էջ 582-588:

33 «Գրիգորիս Աղթամարցի», էջ 78:

34 Ա. ՄՆԱՍՏԱԿԱՆՅԱՆ, Նաղաշ Հովնաթան. Տաղեր, Երեւան, 1983, էջ 48-49:

35 Անդ, էջ 195-199:

36 Յ. ՏԱՂԵԱՆ, Յուցակ հայերէն ձեռագրաց մատենադարանին Մխիթարեանց ի Վիեննա, Վիեննա,

Աղթամարցու երեք հայտնի այլաբանություններին անդրադառնալիս խնդիրն ավելի է բարդանում, որովհետև բանաստեղծն իր ասելիքը այնքան վարպետորեն է միահյուսել վարդ ու բլբուլի՝ ընդունված սիրավեպի մեջ, որ առանձին վերցրած, դժվարանում ենք ասել, թե որտեղից պետք է սկսել շերտավորման գործը: Գրականության պատմությունից գիտենք, որ անգամ բանաստեղծին ժամանակակից ընթերցողները կամ լսողները նրա մտադրած իմաստից բավական հեռու են շեղվել, ինչպես պատահել է Կոստանդին Երզնկացու դեպքում³⁷, էլ ո՛ր մնաց՝ հետագա բանասերները:

Այդ իսկ պատճառով հարցը քննողներն աշխատել են նյութին մոտենալ պատշաճ գոյությունամբ: Մ. Ավդալբեգյանը գրում է, թե այս բանաստեղծություններն առաջին հայացքից զարնան գալուստն ավետող սիրո ջերմ գովերգություններ են, մինչդեռ դրանց խորքը ամեն մի ընթերցող կարող է իր ցանկացած ձևով մեկնաբանել³⁸: Կ. Կոստանյանը նախապես կարծել է, թե «Յետ գնալոյ վարդին» սկսվածքով տաղը կնոջ հանդեպ Աղթամարցու ցուցաբերած հավատարմության արտահայտությունն է, ավելացնելով. «Այս ոգեւորության առարկան Գրիգորիս Աղթամարցուն հանդես է բերել իբրեւ կատարյալ աշուղ»³⁹: Իսկ այնուհետև կարծիքը փոխելով՝ Կոստանյանը տաղին տվել է ավելի խորհրդանշական մեկնաբանություն. իբր թե սոխակի ողբը կսկծում է գավառի անկումը մահմեդական ծանր լծի տակ: Ընդհանառակը, զարգացնելով այս դրույթը, Ավդալբեգյանը կարծում է, թե վարդը խորհրդանշում է բանաստեղծի կարոտած Աղթամար կղզին: Մինչդեռ Ալինյանն իր հոգեւոր ուղղության հետևողությամբ եւ սիրահարների երկխոսությունից ելնելով՝ այն եզրակացությամբ է հանգում, որ վարդի ու բլբուլի կերպարների տակ թաքնված է մարդու էական տարրերի, այսինքն՝ հոգու եւ մարմնի հակադրությունը:

Իսկ եթե այլաբանությունները միախմբենք մյուս գործերի հետ, չնայած նյութի ներկայացման տարբեր ձևերին, երևան են գալիս մեզ արդեն ծանոթ դրվագներ եւ պատկերներ: Նախ վերցնենք «Գարուն երեկ» տաղը: Այստեղ նորից հանդիպում ենք «գանգատի» առանձնացած Գրիգորիսին, որը վանական եղբայրներից խնդրում է բարեխոսել վարդապետի առջև: «Գանգատ մ'առնեմ» տաղում նա աղերսել է՝ «եղբարք, առ ձեզ պաղատիմ, թողութիւն խնդրէք վասն իմ»⁴⁰: Իսկ այստեղ նույն տեսակի արգելքից ազատվելու նպատակով ասում է.

Ո՛վ սիրելիք իմ հաւասար,
Թե՛ գիտէք դեղ՝ արեք ինձ ճար,
Գնամ ի վարդն ի գէնէհար
Եւ ծառայեմ սրտովս յօժար⁴¹:

1895, էջ 175:

37 Տե՛ս **Արմենուհի Մրապյան**, Կոստանդին Երզնկացի. Տաղեր, Երևան, 1962, էջ 145:

38 Տե՛ս «Գրիգորիս Աղթամարցի», էջ 82-83:

39 Անդ, էջ 85:

40 Անդ, էջ 156:

41 Անդ, էջ 322:

Ապա հարցնում է.

Ընդ է՞ր արիր զիս անաես,
Որ հանապազ տանջիմ ես⁴²:

Իսկ այստեղ համոզում է.

Մի՛ համարեր զիս անարժան,
Կամ սպասաւոր ի քոյդ դրան,
Մի՛ արձակեր զգերիս ունայն⁴³:

«Ծաղկունք ասեն» քերթվածը, ընդհակառակը, ավելի անորոշ է այն պատճառով, որ վարդապետին չի ուղղված, այլ գրվել է Աստվածատուր Մեծոփեցու փափագը կատարելու համար, եւ սրանով է բացատրվում տաղի ձեւական արվեստականությունը: Այստեղ եւ որոշում է՝ «գամ իջանեմ վարդենոյն տակ»⁴⁴, եւ վարդի նկարագրությունը մի շարք հատկություններով նմանվում է վերը քննարկված երկերին, օրինակ՝

...Չկայ ի քեզ արատ,
Վրայ աշխարհիս կենաս անհատ,
Ի փորձանաց կենաս ի գատ:⁴⁵

Իսկ սիրահարը գտնվում է նույն դրության մեջ.

Յէ՞ր կու մերժէք զիս կարօտով,
Ես կու գովեմ զվարդն ձայնով...
Ի ձեր սըրտիդ դուք սէր չունիք:
Վասն այն զիմ ձայնս չընդունեցիք⁴⁶:

Գալով Աղթամարցու՝ շատերի կողմից ընդունված գլուխգործոցին, ասենք, որ այստեղ եւս դրսևորվել է սիրահարի հողեկան թախձանքը: «Յեա գնալոյ» տաղի սկզբնամասը թեւ հուսահատական բնույթ ունի, սակայն անսպասելիորեն վերջանում է Աստծո փառաբանությամբ եւ ապագայի ուրախ ակնկալությամբ: Այս տաղը եւս սկսվում է վարդի բացակայությամբ⁴⁷, բայց մի կարեւոր տարբերություն կա. վարդը չի գնացել, այլ տարել են նրան այգուց, ինչպես նրա հայտնի տաղում տանում են այգետիրոջը⁴⁸:

Պարզվում է, որ վարդին հեռացրել են: Դրանից հետո սոխակը դիմում է ծաղիկներին, թաջուններին ու վերջը Արարչին՝ ստույգ տեղեկություն ստանալու համար: Այս որոնումն իր գուգահեռն ունի վարդապետին նվիրված ողբի ժանրում: Օրինակ՝

42 Անդ, էջ 156:

43 Անդ, էջ 223:

44 Անդ, էջ 131:

45 Անդ, էջ 139:

46 Անդ, էջ 139, 141:

47 Տե՛ս անդ, էջ 138, տող 94:

48 Տե՛ս անդ, էջ 259:

Հովհան Որոտնեցու մասին Գրիգոր Տաթևացին գրում է.

Խնդրելով զառաջնորդն լուսոյ... եւ ոչ գտանելով:
Զխնամող բժիշկն՝ եւ ոչ երեսի...
Ակնածեմ զաչս՝ եւ ոչ տեսանեմ
Յածիմ մտօք՝ եւ ոչ լսէ...
Եթէ հարցից՝ ոչ պատասխանէ
Եւ յարտասուս ոչ խնայէ⁴⁹:

Վարդը, դժբախտաբար, մի անմատչելի վայրում է: Ուստի, սոխակը նրան գրում է նամակ, որի մեջ երեսան են գալիս արդեն օգտագործված բանաձևեր: Վարդը «պատուական» է, «երանելի»: Դիմելով նրան՝ սոխակը գրում է.

...Անարատ մարմնով ես դու կենդանի...
Ներքին եւ արտաքին չարն ի քէն փախչի⁵⁰:

Հիշենք՝ մի ուրիշ տաղում եւս ասվում է. «Դեքն սասանին ի քէն»⁵¹: Աշակերտ-վարդապետ հարաբերությունը նույնիսկ ավելի ակնհայտ է դառնում հետևյալ երկտողից.

Թէ զիմ զգաստութիւնս հարցանես դու,
Չունիմ իսելք ու բասար եւ ոչ իմաստութիւն⁵²:

«Զգաստութիւն» բառի հունարեն համարժեքը «νῆψις» կամ «σωφοροσύνη» է: Բառը հաճախակի է հանդիպիւմ հոգեվարժական խրատներում՝ իբրեւ անկիրք կատարելության սահման, որին աշակերտն աշխատում է հասնել փորձառու հոգևոր հոր օգնությամբ:

Տաղի հորինվածքի շարունակությունից պարզվում է, որ վարդը դրախտ է գնացել, մի եզր, որ հակադրված է այգուն. վարդի պատասխանում հետևյալ խորհուրդն է տրվում.

Թէ կատարեալ իւր սէրն ի հետ վարդին է,
Ասցէք թէ ի դրախտն ըզնա որոնէ⁵³:

Արեւագալի ժամանակ սաստիկ որոտ է լսվում, եւ բանաստեղծությունը հասնում է իր գագաթնակետին: Հանկարծ երեսան է գալիս վարդը: Սոխակը փառաբանում է Աստծուն, որովհետեւ «Տեսայ աչօք զվարդն ի մէջ թփերին»⁵⁴:

Սոխակը նրան տեսել է իրականության մեջ: Իսկ ամենօրյա կյանքը դրա համեմատ ընդունում է որպես երազ կամ ցնորք, եւ այս խոստովանությունը լույս է սփռում Աղթամարցու մի ուրիշ առեղծվածի վրա.

Անտի եւ ելն է անմեհի,
Լուծեալ կապիմք անլուծելի⁵⁵:

49 «Նորին Գրիգորի ներբողեան ողբերգաբար ոգեալ ի թաղումն տիեզերայոյս վարդապետին իւրոյ Յօհաննու Որոտնեցոյ» (Տաթևացու քարոզչի Ամառան հատորում), Կ. Պոլիս, 1741, էջ 714:

50 «Գրիգորիս Աղթամարցի», էջ 233-34:

51 Անդ, էջ 183:

52 Անդ, 234:

53 Անդ, էջ 236:

54 Անդ, էջ 237:

55 Անդ, էջ 181:

Թեպետ մարմինը վերանում է, բայց հավերժական հոգին գոյատևում է, եւ միայն այդ պայմանում է, որ վարդապետն ու աշակերտն իրապես միանում են:

Այս բանաստեղծությունը բովանդակում է մի փաստ եւս, որ հաստատում է մեր ուրվագծած այն տեսությունը, թե քերթողը դիմել է իր վարդապետին: Այգին, այգեգործը, սիրածի մարմնի որոնումը, արեւագալի տեսիլքը՝ բոլորը նմանվում են Հովհաննու ավետարանի քսաներորդ գլխին, ուր Հարության առափոյան Քրիստոսը երեւում է Մարիամ Մագդաղենացուն: Աղթամարցու քերթողական արվեստի հետ ծանոթանալուց հետո անհնարին է թվում, թե այդ նմանությունը սոսկ պատահականություն է: Իսկ Քրիստոսի ներկայությունը զգալիս, արդյոք ի՞նչ է բացականչել Մարիամը, ո՞ւմ է իսկապես տեսել: Ահա Ավետարանում գրված է. «Ասէ ցնա Յիսուս. «Մարիամ» եւ նա դարձաւ եւ ասէ ցնա եբրայեցերէն. «Րաբբունի», որ թարգմանի՝ «վարդապետ»⁵⁶:

56 «Աստուածաշունչ մատենան հին եւ նոր կտակարանաց», Վենետիկ, 1805, էջ 721: